

Desvelacion estatua Anne Frank

12 di juni den Parke Wilhelmina

FUNDACION “RESPETA BIDA_sempet corda” tin como obhetivo pa promove un sociedad tolerante cu derechonan civico hancra profundamente den su consenshi nacional. Importante den esaki ta pa reforsa e principio cu tur ciudadano residencia na Aruba tin igual derecho, sin discriminacion y prehuicio. Historia a muestra nos cu un sociedad ta caba den tragedia ora ciudadanonan no por coexisti cu otro den paz y harmonia. P’esey conhuntamente nos tin cu haci un esfuerso pa mantene harmonia den nos relacionnan y un sentido fuerte di responsabilidad pa cu otro su bienestar, pa futuro di nos pais y pa futuro di generacionnan

cu ta bini.

Pa realisa estatua di Anne Frank na Aruba, nos Fundacion a haci un trabao grandi di recaudacion di fondo pa por a yega na e bunita simbolo aki di paz y harmonia. E estatua di Anne Frank a wordo traha door di e escultor Joep Coppens na Hulanda; e estatua mes ta midi 1 m y 32 cm y ta traha di brons.

Pa yega na un sitio adecuado pa pone estatua di Anne Frank, Fundacion “RESPETA BIDA... semper corda” a haya diferente opcion di gobierno di Aruba. Uno cu a atrae nos Fundacion, ta e bunita parke dilanti di Juliana School banda di e estatua di Boy Ecury. Esaki specialmente

pa su cercania di muchanan di school cu ta forma un parti masha importante den e proceso di conscientisacion, cu ta un di e obhetivonan esencial di nos Fundacion. A resulta sinembargo for di archivonan di kadaaster cu e parke dilanti di Juliana School ta forma parti di e parke triangular na unda e estatua di Boy Ecury ta aloca y cu e parke dilanti di Juliana School originalmente tambe ta dedica na honor di Boy Ecury y ta carga e nomber di “Plein Boy Ecury”. E famia di Boy Ecury a prefera pa e estatua di Anne Frank no bin den e parke aki.

Estatua di Anne Frank den Parke Wilhelmina.

Fundacion “RESPETA BIDA... semper corda” a sondea diferente alternativa y despues di un dialogo entre nos Fundacion y Gobierno di Aruba, nos a scoge Parke Wilhelmina como e sitio definitivo pa instala e estatua di Anne Frank.

Instalacion y desvelacion di e estatua di Anne Frank ta e prome proyecto di nos Fundacion; a scoge pa e personahe di Anne Frank, cu kende specialmente hobennan por identifica, pa nos hiba un lucha contra intolerancia y na favor di un comunidad caminda ta reina paz y harmonia. Su diario personal a wordo traduci den mas cu 60 idioma, tambe na Papiamentu bao di e titulo: “E Cas Patras: Diario den forma di carta, 12 di juni 1942 – 01 di augustus 1944”.

Inauguracion di e estatua di Anne Frank lo tuma luga dia 12 di juni venidero, cu ta dia di su cumpleaños. Fundacion “RESPETA BIDA... semper corda” ta invita prensa, pueblo en general y muy en particular hobennan, pa asisti na ceremonianan di inauguracion riba dia 12 di juni 2011.

Ponemento di e estatua ta solamente un di e proyectonan di Fundacion pa cumpli cu nos metanan. Fundacion kier a gradici tur esnan cu a haci donacionnan pa por a yega na e estatua di Anne Frank. Un danki grandi na nos comunidad, tur e negoshinan y ciudadanonan cu a contribui y Gobierno di Aruba cu tabata hopi cooperativo y atento. Danki pa boso cooperacion pa promove tolerancia, paz y harmonia.